

舊小說

戊集 金元明

祁忠毅公傳 并贊

趙秉文

公諱宰。字彥輔。江淮人。宋季以醫術補官。王師破汴得之。後隸太醫。海陵朝。續遷通奉大夫。太醫使。自以數被恩遇。欲自劾。會後宮有疾。召宰診視。既入見。即上言諫。南伐。其略言。國朝之初。祖宗有道。伐無道。曾不十年。蕩遼滅宋。當此之時。上有武元文烈英武之君。下有宗翰宗雄威謀之臣。然猶不能混一區宇。舉江淮巴蜀之地。以遺宋人。況今謀臣猛將。異於曩時。且宋人無罪。師出無名。加以大起徭役。首營中都。民已罷困。興功未幾。復建南京。繕治甲兵。調發軍旅。賦役煩重。民人嗟怨。此人。事不修也。間者晝星見於牛斗。熒惑伏於翼軫。已歲自刑。害在揚州。太白未出。進兵者敗。此天時不順也。舟師水涸。舳艫不繼。而江湖島渚之間。吾雖有士馬之衆。恐無所施。是地利不便也。言甚激切。海陵怒。命戮之於市。籍其家產。天下哀之。強兵以逞。誅戮諫臣。固天所以開

聖人也。越明年。世宗即位於遼東。四年。詔贈公資德。復其田產。泰和初。詔定大臣諡。尙書省掾李秉鈞上言。事有宜緩而急。若輕而重者。名教是也。伏見故贈資德祁宰。以忠言被誅。至今天下慕義之士。靈傷厥心。是以世宗即位。首贈以官。陛下仍錄用其子。甚大惠也。雖武王封比干之墓。孔子譽夷齊之仁。何以異此。而有司拘文以職。非三品不在諡議之列。臣竊疑之。若職至三品。方得請諡。當時居高官食祿者。不爲無人。皆畏罪。渙。曾不敢申一喙。畫一策。以爲社稷計。卒使立名死節之士。顧出於醫卜之流。亦少愧矣。臣謂非常之人。當以非常之禮待之。乞詔有司。特賜諡。以旌其忠。斯亦助名教之一端也。制曰。可。下太常。諡曰忠毅。醫師之職。視疾病。謹藥石。以決死生。可也。至於諫諍。輔拂。不濟。則繼之以死。此公卿大臣所難能。而公以一身易天下之患。功雖不成。亦志士仁人之用心。噫。非烈丈夫。疇克臻此。贊曰。孔子稱有殺身以成仁。如公者可謂近之矣。方海陵虐猜自用。忍戕其母。何愛於公。而區區納忠。以下劘上。卒餌虎口。身雖沒。而名不朽。諡曰忠毅。不亦宜乎。